

आस्था दा केंद्र : दभुज

शालू शर्मा

कन्ट्रैक्चुअल लैक्चरर, जम्मू युनिवर्सिटी, जम्मू

मंदरे दा शैहर खोआने आह्ला जम्मू सच्चे गै मंदरे दा शैहर ऐ कीजे गैं गैं पर इत्थे मंदर दिक्खने गी लब्धी जंदे ना जिस थमां एह लाना लाया जाई सकदा ऐ जे जम्मू वासिये दी ईश्वर दे प्रति बडी डूंहगी आस्था ऐ इत्थूं दे बसनीक जिदे च रली-मिली दियां नेकां जातियां न उंदियां कुलदेवी ते कुलदेवते दियां देहरियां, देहरे ते मंदर बी मती सारी सख्यां च लब्धी जंदे ना एह देहरियां, देहरे बी होरने देवी देवते सम्मान पूजे जंदे न कीजे, इंदे च विद्यमान शक्तियें अपनी जान दी परवाह कीते बगैर अपने समें च उ'नें सामन्तवादी शक्तियें कन्नै टक्कर लैत्ती दी ही। जेह्दे उस समें च गरीब लोकें पर दबदबा बनान लगे दे हे। पर नेहिये म्हान हस्तिये उ'दे जोर जुल्म ते उ'दे अत्याचार गी सैह्न नेई कीत्ता ते उ'दे खलाफ अवाज चुक्की। उंदा विरोध करदे होई अपने प्राणे दी आहुती देइयै उनेंगी मनमानियां करने थमां रोकेआ। जुल्में थमां सते दे इ'नें प्रलय आह्नी दिती ते पही लोके दी क्षमा याचना करने मूजब शांत होइयै अपने कुल्लै गी तरक्की बाद्धे दा वरदान दिता। इंदे चा इक बिरादरी ऐ-बिनालोच। इस बिरादरी दी दाती-दभुज ग्रां च ऐ।

दभुज ग्रां जम्मू शैहरे दे जिला साम्बा च स्थित ऐ। इत्थै सिड़क राहें गै पुज्जेआ जाई सकदा ऐ। जम्मू-कुठुआ राष्ट्री राजमार्ग पर इक जख नां दा ग्रां ऐ ते उत्थूं दा खल्के पासे गी जंदी सड़क दभुज ग्रां गी जंदी ऐ। जख-जम्मू थमां कोई 28 किलोमीटर दी दूरी पर ते उत्थूआं दभुज लगभग दो किलोमीटर दूर। ते साम्बा थमां लगभग 17 किलोमीटर दूर बनी जंदा ऐ।

बिनालोच बिरादरी आस्तै दभुज ग्रां उ'दे आस्था दा केंद्र ऐ की जे इत्थे उंदी बुआ दाती शीलावैन्ती दी देहरी ऐ जिसी ओह होरने देवी देवते आंगर पूजदे ना देहरी दी पौराणिक कथा मताबक देहरी दी स्थापना दा मुख् कारण उंदी दाती माई शीलावैन्ती दा आत्मघात करना ऐ। अज्जै शा कोई चार सौ साल पैहले साम्बा जिले दे बगूना ग्रां दे मंगोत्रे दी धीऽ शीलावैन्ती दा ब्याह् दभुज नां दे ग्रां च बिनालोचे दे घर होआ। संतान दे रूपै च उसदे घर दो धियां गै हियां जे उसदे घरेआहले दी मौत होई गई ते ओह विधवा होई गई। हलातै थमां मजबूर होइयै अपनी धिये गी लेइयै प्यौकै बगूने ग्रां अपने भ्राऊ कश उठी आई। उत्थै उसने इक काली गौ पाली। ओह गौ उसी अपने प्राणे शाऽ बी बद्ध प्यारी ही। ओह उसदे दुद्ध-देही बेचियै अपनी धीएँ दी ते अपनी पालमा बडे शैल ढंगै कन्नै करा दी ही। ओह नित्त गवा गी बंदियै पेड़ा खलांदी ते पही आपूं रूट्टी खंदी ही। गौ बी उसदे इस आदर ते निरठा भाव गी रोज दिक्खदी ही। उसदी उस गवै गी चारने गितै उसदा भ्रा रोज झाड़ै च लेई जंदा हा। इक दिन ओह अपने मित्र साथियें दे गलाने पर छिंज दिक्खन अखनूर जाने आस्तै तयार होई जंदा ऐ। ओह बाह् झाड़ै चा गै गौ अपने गोआड़ी दे सुपुर्द करी जंदा ऐ ते इब्बी आखदा ऐ जे उसदी भैन गी मेरे जाने दा सनेहा देई देऐ ते कन्नै गौ बी साड़े घर छोड़ी आवै। उ'नें दिने लोक पैदल गै यात्रा करदे हे। ओह बगूने थमां अखनूर पैदल गै चली जंदा ऐ। उसदे जाने पुरैन्त दुए रोज ओह पही उससै गोआड़ी कन्नै गौ चरने गी भेजदी ऐ। पर उस दिन सलमेरी दा राजा बी उत्थै शकार खेडन आए दा होंदा ऐ। उसदी नजर शीलावैन्ती दी काली गवा पर पोंदी ऐ तां ओह मोहित होई जंदा ऐ। ओह अपने सपाहियें गी हुक्म दिंदा ऐ जे एह गौ उसदे मैहले पुज्जी जानी चाहिदी। त्रकालै जिसलै उसदी गौ घर नेई पुज्जी तां ओह गोआड़ी घर पुच्छन जंदी ऐ ते उत्थै उसी पता लगदा ऐ जे उसदी गौ गी सलमेरी दा राजा लेई गेदा ऐ। ओह नस्सदी द्रोड़दी राजे दे मैहले पुज्जी जंदी ऐ। राजे अगो फरेआद करदी ऐ जे ओह गौ उसदे प्राण न ते ओह उसगी परताई दिती जा। राजा उसदी फरेआद सुनियै उसगी उस गवै दे बदले होर गवां देने गी तयार होंदा ऐ पर ओह नेई मन्नदी ते आखदी ऐ जे एह गौ उन्न पूजने आस्तै रक्खी दी ऐ। तां बजीर

बिच्च गै बोली पोंदा ऐ जे राजे गी बी ओह पूजने आस्तै चाहिदी ऐ। शीलावैन्ती दे नेई म'न्ने पर बजीर उसी इक हफ्ते बाद गौ लेई जाने आस्तै आखदा ऐ। ओह बजीरै दी गल्ल मन्नियै वापस परतोई औंदी ऐ हफ्ता-दस दिन बीती जाने बाद ओह आपू राजे दे दरबार जंदी ऐ तां उसी पता लगदा ऐ जे दस्से रोजे दा उसदी गवै नै किश बी खादा-पीता नेई ऐ तां ओह द्रोड़दी गवै कन्नै चमकदी ऐ ते गौ अपनी मालकना गी दिक्खियै रम्हांदी ते अपने प्राण त्यागी दिंदी ऐ। एह सब शीलावैन्ती बर्दाश नेई करदी ते राजे कश जाइयै उसदी कट्टार कड्ढदी ऐ ते अपने शरीर परा मास छिल्ली- छिल्लियै राजे पर सुट्टन लगदी ऐ ते कन्नै आखदी ऐ जे गौ हत्या दे कन्नै इक ब्रह्मणी दी हत्या दा पाप बी अपने सिर लेई लै। राजे दे बत्हेरा आक्खने ते माफी मंगने पर ओह घाल होई दी उत्थूं चली जंदी ऐ। ओह अपनी धीएं गी कन्नै लेई सती होने दा फैसला करदी ऐ। बगूने ग्रां पुज्जने पर ओह सारे गी अपनी होई-बीती सुनांदी ऐ ते उत्थै गै अपनी धीएं दे कन्नै आपू बी सती होने दा फैसला करदी ऐ। ग्रां दे लोके उसी नां रोकेआ ते नां गै उसदी धीएं दी सुपुर्दा लैत्ती ते नां गै उसी अपने ग्रां च सती होने दी आज्ञा दित्ती। जिस मूजब दुखी होइयै अपनी धीएं गी लेइयै दभुज ग्रां अपने सौहरे ग्रां पुज्जी। उत्थै चिख बनाइयै सती होई जंदी ऐ। जिसलै ओह सती होंदी ऐ तां उस कन्नै इक नाग ते किश चिड़ी पक्खरू बी सती होई जंदे ना।

किश दिन परैन्त उसदा भ्रा जिसलै छिंज दिक्खियै परतोंदा ऐ तां ग्रां पासेआ उसदी भैन दे सती होने दी पूरी होई बीती उसी पता चलदी ऐ ते ग्रां दे लोके दे समझाने दे बाबजूद ओह अपने घर जाइयै आत्मदाह करी लैदा ऐ। सलमेरी दे राजे गी उ'नें सभनें दी हत्या दा दोश लगदा ऐ। उसदा बौह्ना-खड़ोना, उठना-बैठना, खाना-पीना सब औखा होई गेआ। उसगी कट्टे सत्ते जीवें दी हत्या दा दोश लगदा ऐ। जिस मूजब उसी कोड़ पेई जंदा ऐ। अपने राजवैद शाऽ बत्हेरा लाज कराने पर बी कोई फर्क नेई पोंदा। इक दिन रानी अपने राज ज्योतिश गी बलाई ग्रह-दशा पुच्छदी ऐ तां ओह दस्सदा ऐ जे राजे गी सत्ते जीवें दी हत्या दा दोश लग्गे दा ऐ ते इस थमां मुक्ति कुसै बिनालोच ब्रह्मण गी खुश करियै गै मिली लकदी ऐ।

रानी अपने बजीरै गी कुसै बिनालोच ब्रह्मण गी तुप्पी आहने दा आदेश दिंदी ऐ। पर शीलावैन्ती दे ग्रां दा कोई बी ब्रह्मण तयार नेई होंदा। पर इक गरीब कुआरा ब्रह्मण इस शर्ते पर राजी होंदा जे ओह उसदा ब्याह कराडना। राजे उसदी शर्त मन्नी लैती ते उसी भोजन बगैरा कराई खुश कीता जंदा ऐ ते कन्नै राजकीय ठाठ- बाठ कन्नै उसदा ब्याह बी करोआया जंदा ऐ।

राजे दा अन्न खाने कन्नै उसी शीलावैन्ती दी क्रोपी होई जंदी ऐ ते उसगी कोड़ पेई जंदा ऐ जिस मूजब उसगी अपनी जाति बी बिनालोचे शा खूने बिनालोचे च तबदील करने पौंदी ऐ। उसदा अगला सारा वंश खूने बिनालोच खोआंदे ना। बाद च राजा बी अपना धर्म परिवर्तित करियै सलारिया मुस्लमान बनियै दाती माई दी क्रोपी थमां मुक्त होआ।

उस ब्रह्मण बिनालोच गी दाती माई शीलावैन्ती दी हत्या लग्गी। इक बिरादरी होने दे बाबजूद बी उसी अपनी बक्ख बिरादरी खूने बिनालोच करने पेई गेई। बिनालोचे दी दाती माई नै बिनालोच बिरादरी गी खूने बिनालोचे कन्नै छिन्ना करने दी आज्ञा दित्ती। जेहड़ा उन्दे इस आदेश दा उल्लंघन करदा ऐ शीलावैन्ती माई उसगी दण्ड दिंदी ऐ।

बिनालोचे दा मन्नना ऐ जे अगर कोई कदे गलती कन्नै खूने बिनालोच छहोई जान तां माई दे क्रोधै-मूजब उ'ंदे पूरे शरीर पर जाला पौना ते कन्नै गै दाने निकलना शुरू होई जंदे ना। खूने बिनालोचे दे हत्थे दा खाने मूजब उल्टियां होना शुरू होई जंदियां ना। खाद्धा-पीता पचदा नेई। उस पर कोई दवा दारू बी कम्म नेई करदी।

ते पही जिस मनुखे पर क्रोपी होई दी होंदी ऐ उसगी दाती दे स्थान पर जाइयै उपनी गलती दी माफी मंगने पौंदी ऐ ते कन्नै गै नक्क मूह बी रगड़ने पोंदा ऐ। दाती दे स्थान दी मिट्टी मलियै दाती दे कुण्डै च स्नान करना पौंदा ऐ। ते जिस थमां उसगी रोग-सोग थमां मुक्ति मिलदी ऐ।

दाती शीलावैन्ती गी सती होऐ दे बरे होई गे ना ते उंदा देव स्थान दभुज ग्रां च ऐ की जे उंने अपना आत्मघात कीता हा ते कन्नै बिनालोच बिरादरी गी दखाली बी दित्ती ही। उस स्थान पर इक कुंड बी ऐ जित्थै आइयै लोक स्नान आदि बी करदे ना। उस जल कुंड चा पानी कड़ढने दी आज्ञा दाती ने सिर्फ बिनालोचे दिएं धीएं ते जागते गी दित्ती दी ऐ बिनालोच बिरादरी दी कोई बी नूह उस जल कुंड चा स्नान आस्तै पानी नेई कही सकदी। दाती मताबक ऐसा करने पर ओह बी दण्ड दी भागीदार होगा।

कुंडे दे कन्नै गै दाती ते उसदी धीएं दे मौहरे दी स्थापना कीत्ती गेदी ऐ उत्थै बिनालोच बिरादरी दियां नूहां झुण्ड कड़ढियै गै दर्शन करदियां न ते बुआ दाती थमां अशीरवाद लैदियां ना।

बिनालोचे अपनी श्रद्धा मताबक दाती दे भ्राऊ नमित बी बगुनां च मंदिर बनाए दा ऐ ते उत्थै बी मत्था टेकदे न।

बिनालोच बरादरी दे लोक केई चाल्ली दे अनुष्ठान दाती माई दे दरबार च सम्पन्न करदे न। व्याह कशा पैह्लें दाती माई गी नींदरा दित्ता जंदा ऐ। जिस च मठाई दा डब्बा बगैरा बी चढ़ाया जंदा ऐ। ते पही ब्याह परैन्त उसदे कुंडे दे इर्द गिर्द नमें ब्याहता जोड़े दे रकैधे बी फराए जंदे ना। दाती मां ते दाती दी धीएं आस्तै नमें बख भेंट कीत्ते जंदे ना।

निरजला कास्ती दे बाद औने आहली पुन्नेआ गी इस स्थान पर बड़ी बड़डी मेल लगदी ऐ। इस मेल च बिनालोच ब्रह्मणे दे इलावा होर बी केई जातियें दे लोक शिरकत करदे ना। ओह बी दाती माई दे कुण्ड च स्नान करियै दाती दा आशीवाद लैंदे ना। बिनालोच बिरादरी दी धीएं दी बी उस दिन उसै जगह मेल पौंदी ऐ जिस च ओह दाल-चौल, नमक मिर्च बगैरा राशन पाई अपनी हाजरी लगांदी ना।

उस दिन उत्थै बड़ा बड़डा मेला बी लग्गदा ऐ दूरा-दूरा आए दे श्रद्धालू प्रसाद ग्रैहण करदे न ते दाती माई शीलावैन्ती थमां सुन्दर भविकख दी कामना करदे ना। उस दिन लौकियां - लौकियां अस्थाई हटियां बी लग्गी दियां होदियां ना। ते परतोंदे बेल्लै बच्चे उत्थुआं खडोने बी खरीददे ना।

संदर्भ

सूचक दा नां ते पता

1. रतन चंद, 74 साल, उधमपुर
2. मीतू शर्मा, 29 साल, पार्टी